

VLA, 8693  
23.4.1598

Transkription:

Wir Nachbenante mit Namen Georg und Hanns Rüef gebrüedere. Item Michael Hueber, Bartlome Raubergs, und dann Martin Hueber als ain Recht verordneter Voggt, Weylundt Georg Diemen seligen Eelichen hinderlaßnen Khindern alle von Thorenbeuren. Bekhennen offenlich samet, sonders, und unverschaidenlich für unß all unßer, und meiner Voggtkhinder Erben, und Nachkhomen, und thuen khundt Allermenigclich mit dem briefe. Das wir mit veraintem freyen muetes willen, Wolbedachtem Sinn und mueth zubefurderung unnsers, und der selbern meiner Voggtkhindern beßern nuz, und fromen wegen, Besonder mit Handen des Ersamen Weisen Sebastian Keckhlins, derzeit Aman des Gerichtz daselbsten zue Thorenbeuren, Auferecht, und redlich verkhaufft und zuekhaufen gegeben haben Aines besteten vesten ewigen und Imerwerennden khaufs, und geben auch hiemit wißentlich, pest: und bestendigster form der Rechten in Craft diz briefs. Dem wolgebornnen Herren Herrn Casparn Graven zue der Hohenemps und Gallera p unnsers genedigen Herren, Auch allen Iren gnaden Erben, und Nachkhomen, Nemlichen unnsern und meiner Voggtkhinder aigen Weingarten im Oberdorf zue genandtem Thorenbeuren gelegen, stost oben an Iren gnaden aigen guet, zum andern wider an Ir gnaden aigen guet und an Georg Großen, unden an die Lanndstras, und zur vierten seiten an das gäßelin so hinderem Schloß hinauf geet. Mit grundt, gradt, veld, waßen, wun waid, stockh stain, gestrüt, gereüt, Rebwerch, Rebstickhl, Rebgezimer genngen stegen, und wegen, und sonst gemeingclich mit allen anderen daselben Rechten, und gerechtikhaiten ein, und Zugehörungen, Benent, und unbenents, Auch für frey ledig loß, und gegen Allermenigclichen unversezt, und unverkhombert. Und also ist der ewig Redliche khauf erganngen und beschechen, Benandlichen umb Ainhundert Zueundsechzig gulden dreißig Kreuzer Bemischin Münz gueter genemer dez Statt Lindaw und gemainer Landtßwerung. Dero wir aller gar und ganz von Iro gnaden gnediglichen außgericht und bezalt worden seind, Nach unnsere willn und guetem benuegen. Iro gnaden auch alle derselben Erben und Nachkhomen, hiemit darumben quitieren, Ledig, und loes Zellennde. Und hierauf diz ewigl. und redliches khaufs, wie vorsteet. So sollen und wir Obernente Verkhöufere, Auch alle unnsere, und derselben meiner Voggtkhindere Erben, und Nachkhomende Vöggt. Merwoln ermelten Herren Graven als Khouferr, Auch allen Iro gnaden Erben und Nachkhomen Recht guet, und getrew erfftig geverren fürstand, und versprecherr. Gegen Allermenigclichen sein, Nach Recht. Wo wir wenig, oder gegen wem Si des An Gaistlich: oder Weltlichen Gerichten, Immer bedurffen oder noturftig sein werden, Alfort in unnsere, und Mergedachten meiner Voggtkhinder aigen Costen, und ohne Iren gnaden derselben Erben, und Nachkhomen nachtail, und schaden, Bey unnsers wahren und gueten trewen genzlichen one alle ein und widerred Aufzug und geverde. Und des zue Warem urkhundt. So haben wir Merbeschribne verkhoufere, allesamentlich ainhellig Mit vleiß, und Ernst erpeten, Den Obgemelten Aman Sebastian Keckhlin. Das er sein aigen Ambts Innsigl für unß all unnsere, und derselben meiner Voggtkhinder Erben. (. Doch Ime Aman und seinen Erben in albeg onschädlich.). an disen brief gehenngt hat, Der geben ist Auf Sant Georgl des hailigen Riterstag. Im Fünfzechenhundert Achtundneunzigisten Jahre.

Rückseite:

Khaufbrief  
Herrn Casparn Grafen zu der Hohen Embs und Gallera Pr. 162fl 30x  
Umb die Reben underdem Bawstall an der Gaßen.  
1598 Apr. 23